

60 onns Club da skis Ruschein

■ (cp) Dumengia proxima va ei vinavon cun «da cuminonza a Ruschein – la sera dils treis». Quella retscha d'occurrentzas, ch'ha priu si'entschatta la primavera 2016, ei sesviluppada, ha cattu interess ed ei arrivada uss alla 20avla serada. E quella ei dedicada ad ina dallas uniuns da Ruschein che sa festivar uonn in giubileum rodund: Il club da skis. Sonda vargada ha l'usitada cuorsa dil club giu liug a Ladir. En «da cuminonza» dumengia, ils 3 da mars va ei per la damonda: Tgei ha quei club «purtau» al vitg? Campiuns mundials ein tochen ussa buca vegni ord il Club da skis Ruschein. Mo il club ha fatg gronda lavur per promover il sport da skis gia tier ils affons. Cheutras ha el enfirmiu il contact denter las generaziuns e contribuui alla cuminonza dil vitg. Entschiet ha tut mudestamein il schaner 1959. Albert Klaiss, Toni Patt e Robert Truog ein stai ils emprems en la suprastonza dall'uniun. Il sulet dad els treis che viva aunc ei Toni Patt ch'habitescha dapi biars onns en la regiun da Lucerna. Cu il club ei vegnius fundaus veva el 18 onns ed era in narr da skis. Roger Staub dad Arosa hagi getg ad el: «Toni, sche ti vul far cuorsas stos ti cumprar ina giacca impermeabla.» Schiglioc vevi el en dad ir cun skis caultschas a cugn ed in pullover. Ses emprems skis ha el survegniu cun tschun onns. Siu bab veva fatg quels o da duas lattas-butshin.

Avon biebein 10 onns ha Patt calau dad ir cun skis. Il motiv: Per el seigi quei oz memia bia trumbli e fuola sin pista.

Alla sera «da cuminonza» ein treis hosps envidai da raquintar dil club, treis hosps che s'audan tier differentas generaziuns. Marcus Menzli, 73 onns, ha fatg era uonn la cuorsa dil club. Cun sia fatschenta da sport eis el dapi biars onns in dils sponsurs dil club. El seregorda digl emprem runal insumma sil glatscher dil Vorab – installaus igl onn 1972 dil Club da skis Ruschein, dil temps ch'el era pre-

sident dil club! Gieri Arpagaus, 55 onns, il president actual ei oriunds da Ladir e sesents a Favugn. Senza el dess ei oz forsa buca pli il Club da skis Ruschein, ni buc en quella fuorma. Dapi 25 onns s'engascha el senza vegnir staunchels. El vegn a raquintar tgei che motivescha el d'impunder ton temps per in club en la Foppa. Bianca Bleuler, 23 onns, gi ch'ella hagi empriu gia d'affon enorm bia, e buca mo dad ir cun skis, grazia al club. Per ella er'ei clar ch'ella vegli ussa, sco ina dallas menadras da «Giuventetgna e Sport»

dar vinavon zatgei era alla proxima generaziun. Sper il club da skis dat ei a Ruschein uonn aunc treis autras uniuns che san festivar in giubileum rodund: La societad da tir Vorab ha 100 onns, l'uniun da dunnas 80 ed il chor mischedau 40 onns. Ensemen cun il club da skis fan quellas uniuns ils 26 d'october 2019 cumineivlamein ina fiasta da giubileum.

«60 onns Club da skis Ruschein». Dumengia, ils 3 da mars 2019 allas 20.15, casa da scola Crestas, Ruschein.
Dapli sin www.dacuminonza.ch



Giuventetgna e Sport: Affons e menaders dil Club da skis Ruschein, december 2018. FOTO R. VETSCH